
OFFERYNNAU STATUDOL CYMRU

2020 Rhif 1367 (Cy. 303)

ADDYSG, CYMRU

Rheoliadau Anghenion Dysgu Ychwanegol (Rhestr o Sefydliadau Ôl-16 Arbennig Annibynnol) (Cymru) 2020

<i>Gwnaed</i> - - - -	26 Tachwedd 2020
<i>Gosodwyd gerbron Senedd Cymru</i> - - - -	30 Tachwedd 2020
<i>Yn dod i rym</i> - -	4 Ionawr 2021

Mae Gweinidogion Cymru, drwy arfer y pwerau a roddir iddynt gan adran 56 o Ddeddf Anghenion Dysgu Ychwanegol a'r Tribiwnlys Addysg (Cymru) 2018(1), yn gwneud y Rheoliadau a ganlyn:

Enwi a chychwyn

1. Enw'r Rheoliadau hyn yw Rheoliadau Anghenion Dysgu Ychwanegol (Rhestr o Sefydliadau Ôl-16 Arbennig Annibynnol) (Cymru) 2020 a deuant i rym ar 4 Ionawr 2021.

Dehongli

2. Yn y Rheoliadau hyn—

ystyr “DDdY” (“ALP”) yw darpariaeth ddysgu ychwanegol;

ystyr “y Ddeddf” (“*the Act*”) yw Deddf Anghenion Dysgu Ychwanegol a'r Tribiwnlys Addysg (Cymru) 2018;

ystyr “y rhestr” (“*the list*”) yw'r rhestr a gyhoeddir gan Weinidogion Cymru o dan adran 56(2) o'r Ddeddf;

ystyr “SOAA” (“*ISPP*”) yw sefydliad ôl-16 arbennig annibynnol o fewn ystyr adran 56(6) o'r Ddeddf;

ystyr “trefniadau yn yr SOAA” (“*arrangements at the ISPP*”) yw'r trefniadau a restrir yn rheoliad 3(b).

Y rhestr o SOAAau

3. Rhaid i'r rhestr gynnwys, mewn cysylltiad â phob SOAA sydd wedi ei gynnwys—

(a) yr wybodaeth a ganlyn—

- (i) ei enw masnachu;
 - (ii) cyfeiriad y wefan (os yw ar gael);
 - (iii) ei gyfeiriad;
 - (iv) a yw'n darparu llety preswyl;
 - (v) y dyddiad y cynhwyswyd yr SOAA yn y rhestr;
 - (vi) y dyddiad y cymeradwywyd unrhyw newidiadau i'r trefniadau yn yr SOAA gan Weinidogion Cymru;
- (b) yr wybodaeth a ganlyn sy'n ymwneud â threfniadau yn yr SOAA—
- (i) ystod oedran y personau y mae'r SOAA yn darparu ar eu cyfer;
 - (ii) nifer y personau y mae'r SOAA yn darparu ar eu cyfer;
 - (iii) y perchennog;
 - (iv) y math o DDdY a ddarperir gan yr SOAA.

Trefniadau SOAAau

4.—(1) Caiff perchennog SOAA wneud cais i Weinidogion Cymru i gymeradwyo trefniadau yn yr SOAA.

(2) Rhaid i gais am gymeradwyaeth o dan y rheoliad hwn gael ei wneud yn ysgrifenedig.

(3) Rhaid i Weinidogion Cymru hysbysu'r perchennog pa un a ydynt yn cymeradwyo'r trefniadau ai peidio.

(4) Rhaid i'r perchennog ddarparu i Weinidogion Cymru unrhyw wybodaeth sy'n ymwneud â'r trefniadau yn yr SOAA sy'n rhesymol ofynnol gan Weinidogion Cymru.

Gofynion i gydymffurfio â hwy fel amod o gynnwys SOAA yn y rhestr

5.—(1) Caiff perchennog SOAA wneud cais i Weinidogion Cymru i gynnwys SOAA yn y rhestr.

(2) Er mwyn i SOAA gael ei gynnwys yn y rhestr—

(a) rhaid bod y trefniadau yn yr SOAA wedi eu cymeradwyo;

(b) rhaid i berchennog yr SOAA ddarparu'r canlynol i Weinidogion Cymru—

(i) yr wybodaeth a grybwyllir yn rheoliad 3(a)(i) – (iv);

(ii) tystiolaeth sy'n bodloni Gweinidogion Cymru bod yr SOAA yn ariannol hyfyw;

(iii) tystiolaeth sy'n bodloni Gweinidogion Cymru o ran ansawdd y DDdY a ddarperir yn yr SOAA gan gynnwys—

(aa) (os yw'r SOAA yng Nghymru) adroddiadau sy'n ymwneud â'r SOAA gan Brif Arolygydd Ei Mawrhydi dros Addysg a Hyfforddiant yng Nghymru neu Weinidogion Cymru (os ydynt ar gael);

(bb) (os yw'r SOAA yn Lloegr) adroddiadau sy'n ymwneud â'r SOAA gan Brif Arolygydd Ei Mawrhydi dros Addysg, Gwasanaethau Plant a Sgiliau neu'r Comisiwn Ansawdd Gofal (os ydynt ar gael);

(iv) unrhyw wybodaeth arall sy'n ymwneud â'r DDdY neu reoli neu lywodraethu'r SOAA sy'n rhesymol ofynnol gan Weinidogion Cymru.

(3) Rhaid i Weinidogion Cymru hysbysu'r perchennog pa un a gaiff yr SOAA ei gynnwys yn y rhestr ai peidio.

Gofynion i gydymffurfio â hwy tra bo'r SOAA wedi ei gynnwys yn y rhestr

6. Rhaid i SOAA sydd wedi ei gynnwys yn y rhestr, yn dilyn cais gan Weinidogion Cymru, ddarparu'r wybodaeth a ganlyn iddynt—

- (a) tystiolaeth sy'n bodloni Gweinidogion Cymru bod yr SOAA yn ariannol hyfyw;
- (b) tystiolaeth sy'n bodloni Gweinidogion Cymru o ran ansawdd y DDdY gan gynnwys—
 - (i) (os yw'r SOAA yng Nghymru) adroddiadau sy'n ymwneud â'r SOAA gan Brif Arolygydd Ei Mawrhydi dros Addysg a Hyfforddiant yng Nghymru neu Weinidogion Cymru (os ydynt ar gael);
 - (ii) (os yw'r SOAA yn Lloegr) adroddiadau sy'n ymwneud â'r SOAA gan Brif Arolygydd Ei Mawrhydi dros Addysg, Gwasanaethau Plant a Sgiliau neu'r Comisiwn Ansawdd Gofal (os ydynt ar gael);
- (c) unrhyw wybodaeth arall sy'n ymwneud â'r DDdY, rheoli neu lywodraethu'r SOAA neu'r trefniadau yn yr SOAA sy'n rhesymol ofynnol gan Weinidogion Cymru.

Newid i drefniadau

7.—(1) Caiff perchennog SOAA wneud cais i Weinidogion Cymru i gymeradwyo newid yn y trefniadau yn yr SOAA.

(2) Rhaid i gais am gymeradwyaeth o dan y rheoliad hwn gael ei wneud yn ysgrifenedig ac, yn achos cymeradwyaeth i newid perchennog, rhaid i'r perchennog newydd arfaethedig wneud y cais.

(3) Rhaid i Weinidogion Cymru hysbysu'r perchennog ac unrhyw berchennog newydd arfaethedig a pa un ydynt yn cymeradwyo'r newid i'r trefniadau ai peidio.

Cais gan y perchennog i ddileu'r SOAA o'r rhestr

8.—(1) Caiff perchennog SOAA wneud cais i Weinidogion Cymru i ddileu'r SOAA o'r rhestr.

(2) Rhaid i gais i ddileu o dan y rheoliad hwn gael ei wneud yn ysgrifenedig a phennu dyddiad o leiaf 28 o ddiwrnodau o ddyddiad y cais.

(3) Bydd dileu'r SOAA o'r rhestr yn cymryd effaith—

- (a) ar y dyddiad a bennir yn y cais; neu
- (b) ar ddyddiad y cytunir arno rhwng perchennog yr SOAA a Gweinidogion Cymru.

(4) Rhaid i Weinidogion Cymru hysbysu pob awdurdod lleol yng Nghymru o'r dyddiad y bydd yr SOAA yn cael ei ddileu o'r rhestr.

Ystyried dileu'r SOAA o'r rhestr

9.—(1) Caiff Gweinidogion Cymru ystyried y canlynol wrth benderfynu pa un ai i ddileu SOAA o'r rhestr—

- (a) tystiolaeth sy'n ymwneud â hyfywedd ariannol yr SOAA;
- (b) yr adroddiadau sy'n ymwneud â'r SOAA y cyfeirir atynt yn rheoliad 5(2);
- (c) unrhyw dystiolaeth a ddaw i law o ganlyniad i gais o dan reoliad 6; a
- (d) unrhyw bryderon difrifol am yr SOAA a ddaw i law gan awdurdod lleol, person sy'n mynychu'r SOAA neu gan unrhyw berson arall.

Dileu o'r rhestr

10.—(1) Os yw Gweinidogion Cymru yn penderfynu dileu SOAA o'r rhestr, rhaid iddynt hysbysu perchennog yr SOAA am y penderfyniad hwnnw.

(2) Rhaid i Weinidogion Cymru hysbysu pob awdurdod lleol yng Nghymru am y penderfyniad hwnnw.

(3) Caiff yr SOAA ei ddileu o'r rhestr yn unol â rheoliad 11(3) neu 12(3) (yn ôl y digwydd) os yw'r perchennog yn arfer yr hawl i apelio y cyfeirir ati yn rheoliad 11, ac ym mhob achos arall bydd y dileu yn cymryd effaith ar ôl i 28 o ddiwrnodau ddod i ben sy'n dechrau â'r diwrnod y cyflwynir yr hysbysiad o'r penderfyniad i ddileu i'r perchennog.

Hawl i apelio

11.—(1) Caiff perchennog SOAA apelio i'r Tribiwnlys Haen Gyntaf yn erbyn penderfyniad—

- (a) i wrthod rhestru SOAA;
- (b) i ddileu SOAA o'r rhestr;
- (c) i beidio â chymeradwyo trefniadau yn yr SOAA;
- (d) i beidio â chymeradwyo newid i drefniadau yn yr SOAA.

(2) Rhaid i apêl gael ei chyflwyno o fewn y cyfnod o 28 o ddiwrnodau sy'n dechrau â'r diwrnod y cyflwynir hysbysiad o'r penderfyniad i wrthod, i ddileu, neu i beidio â chymeradwyo i'r perchennog (“y cyfnod apelio”).

(3) Pan fo apêl yn cael ei gwneud yn erbyn penderfyniad i ddileu SOAA o'r rhestr—

- (a) os caiff yr apêl ei thynnu'n ôl neu ei gwaredu fel arall cyn i'r tribiwnlys ddyfarnu arni o dan reoliad 12, caiff Gweinidogion Cymru ddileu'r SOAA o'r rhestr ar unrhyw ddyddiad ar ôl y cyfnod apelio y maent yn ei benderfynu, a
- (b) mewn unrhyw achos arall, dim ond yn unol â'r dyfarniad a wneir gan y tribiwnlys o dan reoliad 12 y caiff Gweinidogion Cymru ddileu'r SOAA o'r rhestr.

(4) Yn achos apêl yn erbyn penderfyniad i ddileu SOAA o'r rhestr, os yw'r tribiwnlys, ar unrhyw adeg, yn ystyried bod perygl o niwed difrifol i les personau cyn y dyfermir ar yr apêl, caiff drwy orchymyn ddarparu bod yr SOAA i'w ystyried fel pe na bai wedi ei gynnwys ar y rhestr at ddibenion adran 56(3) o'r Ddeddf hyd nes y bydd y tribiwnlys yn dyfarnu ar yr apêl o dan reoliad 12 (neu'n dirymu'r gorchymyn cyn dyfarnu ar yr apêl felly).

Dyfarnu ar apêl

12.—(1) Yn achos apêl yn erbyn penderfyniad i beidio â chymeradwyo trefniadau neu i beidio â chymeradwyo newid i drefniadau, caiff y tribiwnlys—

- (a) cadarnhau'r penderfyniad i beidio â chymeradwyo, neu
- (b) cymeradwyo'r trefniadau neu'r newid mewn trefniadau ei hunan.

(2) Yn achos apêl yn erbyn penderfyniad i ddileu'r SOAA o'r rhestr, caiff y tribiwnlys—

- (a) cadarnhau'r penderfyniad, neu
- (b) dirymu'r penderfyniad.

(3) Pan fo'r tribiwnlys, o dan baragraff (2)(a), yn cadarnhau penderfyniad, rhaid i Weinidogion Cymru ddileu'r SOAA o'r rhestr ar unrhyw ddyddiad y mae'r tribiwnlys yn ei bennu neu, os nad yw'n pennu dyddiad, ar unrhyw ddyddiad y mae Gweinidogion Cymru yn ei benderfynu.

(4) Yn achos apêl yn erbyn penderfyniad i wrthod cynnwys yr SOAA yn y rhestr, caiff y tribiwnlys—

- (a) cadarnhau'r penderfyniad, neu
- (b) cyfarwyddo Gweinidogion Cymru i gynnwys yr SOAA yn y rhestr.

26 Tachwedd 2020

Kirsty Williams
Y Gweinidog Addysg, un o Weinidogion Cymru

Statws This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn wedi eu gwneud o dan adran 56 o Ddeddf Anghenion Dysgu Ychwanegol a'r Tribiwnlys Addysg (Cymru) 2018 ("y Ddeddf") ac maent yn gwneud darpariaeth mewn perthynas â chynnwys sefydliad ôl-16 arbennig annibynnol ("SOAA") yn y rhestr ("y rhestr o SOAAau") a gyhoeddir gan Weinidogion Cymru o dan adran 56(2) o'r Ddeddf.

Mae'r Rheoliadau yn manylu ar gynnwys y rhestr o SOAAau gan gynnwys gwybodaeth benodol sy'n ymwneud â'r trefniadau yn yr SOAA (rheoliad 3).

Mae rheoliad 4 yn manylu ar sut y caniateir gwneud cais i Weinidogion Cymru i gymeradwyo'r trefniadau yn yr SOAA.

Mae rheoliad 5 yn manylu ar y gofynion y mae rhaid cydymffurfio â hwy er mwyn i SOAA gael ei gynnwys yn y rhestr o SOAAau ac mae rheoliad 6 yn manylu ar y gofynion y mae angen cydymffurfio â hwy er mwyn i'r SOAA barhau i gael ei gynnwys yn y rhestr o SOAAau.

Os yw perchennog yn dymuno gwneud newidiadau i'r trefniadau sydd wedi eu cymeradwyo yn yr SOAA, yna caiff perchennog yr SOAA wneud cais i Weinidogion Cymru i gymeradwyo'r newid (rheoliad 7).

Mae rheoliad 8 yn darparu y caiff perchennog SOAA wneud cais i Weinidogion Cymru i ddileu'r SOAA o'r rhestr o SOAAau.

Mae rheoliad 9 yn manylu ar yr hyn y caiff Gweinidogion Cymru ei ystyried wrth benderfynu a ddylid dileu SOAA o'r rhestr o SOAAau. Os yw Gweinidogion Cymru yn penderfynu y dylid dileu SOAA o'r rhestr o SOAAau, mae angen iddynt hysbysu'r perchennog a phob un o awdurdodau lleol Cymru am y penderfyniad hwnnw (rheoliad 10).

Mae rheoliad 11 yn manylu ar yr hawl i apelio i'r Tribiwnlys Haen Gyntaf mewn cysylltiad â phenderfyniad gan Weinidogion Cymru i wrthod rhestru SOAA, i ddileu SOAA o'r rhestr o SOAAau neu i beidio â chymeradwyo trefniadau neu newid mewn trefniadau yn yr SOAA. Mae rheoliad 12 yn manylu ar sut y caiff y Tribiwnlys ddyfarnu ar apêl a wneir o dan reoliad 11.

Y Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth: Yr Adran Addysg, Llywodraeth Cymru, Parc Cathays, Caerdydd, CF10 3NQ.